



Mkate wa Kila Siku

Umeahidiwa

Utupe leo riziki yetu.—Mathayo 6:11.

Kama mtoto, utapokea kila siku kile kinachohitajika kwa hitaji la kila siku. Kila siku unapaswa kuomba, “Utupe leo riziki yetu.” Usisumbuke moyo ikiwa hauna vya kutosha kwa ajili ya kesho. Unao uthibitisho wa ahadi Yake, “Ukae katika nchi, na hakika utalishwa.” Daudi anasema, “Nalikuwa kijana nami sasa ni mzee, lakini sijamwona mwenye haki ameachwa, wala mzao wake akiomba chakula.”

Yule Mungu aliyetuma kunguru amlishe Eliya katika kijito cha Kerithi hatampita hata mmoja wa watoto Wake waaminifu, na wenye kujikana nafsi. Kwa yeye aendaye katika haki imeandikwa, “Atapewa chakula chake; maji yake hayatakoma.” “Hawataaibika wakati wa ubaya, Na siku za njaa watashiba.” “Yeye aliyemwachilia Mwana wake mwenyewe, bali alimtoa kwa ajili yetu sisi sote, atakosaje kutukirimia na mambo yote pamoja naye?”

Yeye ambaye alipunguza mahangaiko na mashaka ya mama Yake mjane, na kusaidia kutoa mahitaji kwa ajili ya kaya ya Nazareti, anamhurumia kila mama katika mahangaiko yake ili kuwapatia watoto wake chakula. Yeye ambaye aliwahurumia makutano kwa sababu “walikuwa wamechoka na kutawanyika” bado anawahurumia maskini wanaoteseka. Mkono Wake umenyoshwa kwao katika baraka na katika maombi yayo hayo Aliyowapa wanafunzi Wake, anatumkumbusha kuwakumbuka maskini (The Signs of the Times, Novemba 4, 1903).

Ombi kwa ajili ya mkate wa kila siku linajumuisha sio tu ili kuhuisha mwili, lakini mkate ule wa kiroho ambao utastawisha nafsi hata uzima wa milele. Yesu anatusihi, “Msikitendee kazi chakula chenye kuharibika, bali chakula kidumucho hata uzima wa milele” (Yohana 6:27). Anasema, “Mimi ndimi chakula chenye uzima kilichoshuka kutoka mbinguni; mtu akila chakula hiki, ataishi milele” (aya ya 51). Mwokozi wetu ni mkate wa uzima, na ni kwa kuutazama upendo Wake, kwa kuupokea nafsini, ndivyo tunavyoula mkate ushukao kutoka mbinguni.

Tunampokea Yesu kwa njia ya Neno Lake, na Roho Mtakatifu ametolewa ili kufungua Neno la Mungu katika uelewa wetu, na kufikisha mahali pake ukweli mioyoni mwetu. Tunalazimika kuomba kila siku kwamba tunaposoma Neno Lake, Mungu atamtuma Roho Wake ili kutufunulia ukweli ambao utaimarisha nafsi zetu kwa ajili ya mahitaji ya kila siku.

Katika kutufundisha kuomba kila siku kwa ajili ya kile tunachohitaji—baraka zote za kimwili na za kiroho—Mungu analo kusudi la kutimiliza kwa manufaa yetu. Angetutaka tutambue utegemezi wetu juu ya utunzaji Wake wa kudumu, kwa kuwa anatafuta kutuvuta katika ushirika pamoja na Yeye. Katika ushirika huu na Kristo, kwa njia ya maombi na kujifunza kweli kuu na za thamani za Neno Lake, kama roho zenye njaa tutalishwa; kama wale walio na kiu, tutaburudishwa kwenye chemchemi ya uzima (Thoughts from the Mount of Blessing, 112, 113).